




ՄԱՀ ՄԻՆԱՍ ՄԻՆԱՍՅԱՆԻ
(1892—1975)

Կարճատև հիվանդությունից հետո, 1975 թվականի նոյեմբերի 25-ին, Երևանում, վախճանվեց բազմալատուկ դասախոս, իրավաբան, թարգմանիչ, 1945—1954 թթ. հոգևոր գեմարանի տեսուչ և Գերագույն հոգևոր խորհրդի անդամ Մինաս Սարգսի Մինասյանը:

Հանգուցյալը ծնվել է 1892 թվականին Արևմտյան Հայաստանի Կյուրին քաղաքում: Ծննդավայրում նախնական կրթությունը ստանալուց հետո, ավարտում է Ամերիկյան քոլեջը, ապա Կ. Պոլսի համալսարանի իրավաբանական ֆակուլտետը:

Այնուհետև Մ. Մինասյանը նվիրվում է կրթական-մանկավարժական գործունեության:

1922 թվականին, բնտանիքով փոխադրվելով Կովկաս, նախ բնակվում է Թիֆլիսում, ապա, 1926 թվականին, բնդմիջոց հատաատվում Երևանում: Այստեղ նա սկզբում աշխատակցում է հայ մամուլին: Երկար տարիներ աշխատում է նաև որպես ժողովրդական դատավոր:

Այնուհետև նա կրկին անցնում է մանկավարժական գործունեության և 30 տարի անընդմեջ եվրոպական և արևելյան լեզուներ դասավանդում Երևանի պետական համալսարանում, Խաչատուր Աբովյանի անվան հայկական մանկավարժական, ինչ-

պես նաև գեղարվեստա-թատերական ինստիտուտներում: Միաժամանակ Մ. Մինասյանն աշխատում է Հայկական ՍՍՀ գիտու-



թյունների ակադեմիայի պատմության ինստիտուտում՝ որպես ավագ գիտական աշխատող: Տարիներ շարունակ նա զբաղ-

վում է թարգմանչական գործունեությամբ: Երկար ժամանակ Մ. Մինասյանը եղել է Կյուրիևի Հայրենակցական միության նախագահը Հայաստանում և հանդիսացել Սիյուրքահայ կոմիտեի Հայ հայրենակցական միությունների խորհրդի անդամ:

1945 թվականի հունիսին Մայր Աթոռում գումարված ազգային-եկեղեցական ժողովի կողմից Մ. Մինասյանն ընտրվել է Գերագույն հոգևոր խորհրդի անդամ և մինչև 1954 թվականը պատասխանատվության բարձր գիտակցությամբ ու սրտագին ջանքերով կատարել իր պարտականությունները:

1945 թվականի նոյեմբերին Տ. Տ. Գևորգ Զ կաթողիկոսի հրամանով ս. Էջմիածնի հոգևոր ճեմարանի վերաբացման առիթով Մ. Մինասյանը հրավիրվում է Մայր Աթոռ՝ իբրև հոգևոր ճեմարանի տեսուչ և միաժամանակ անցըներեն լեզվի դասախոս: Հոգևոր ճեմարանում նա ծավալում է կրթական-մանկավարժական բեղուն գործունեություն:

Մ. Մինասյանը բազմաթիվ շահեկան հոդվածներով հանդես է եկել Մայր Աթոռի պաշտոնաթերթ «Էջմիածին» ամսագրում:

Բարեխիղճ և նվիրված աշխատանքի շնորհիվ Մ. Մինասյանը Մայր Աթոռում վայելել է միաբանության, ուսանողության և բոլոր աշխատակիցների սերն ու հարգանքը:

Նոյեմբերի 26-ին, Մ. Մինասյանի մանվան տխուր առիթով, Վեհափառ Հայրա-

պետը հետևյալ ցավակցական հեռագիրն է ուղարկում հանգուցյալի սգավոր հարազատներին.

«Վիշտ պատճառեց Մեզ մահվան գույժը վաստակաշատ կրթական գործիչ Մինաս Մինասյանի, որ երկար տարիներ շարունակ նվիրումով ու արդյունավետությամբ վարել էր տեսչության պաշտոնը սուրբ Էջմիածնի հոգևոր ճեմարանի:

Անձամբ Մենք ճանաչել ու գնահատել ենք նրան՝ իբրև ազնիվ կրթական մշակ ու հայրենասեր դաստիարակ:

Մայր Աթոռում նրա բարի հիշատակը կպահպանվի անմոռաց:

Մեր սրտագին ցավակցություններն ենք ներկայացնում սգակիր ընտանիքի բոլոր անդամներին՝ մաղթելով նրանց արևշատություն:

Հարգանք հանգուցյալ Մինաս Մինասյանի վաստակին և օրհնություն նրա արդար հոգուն»:

Դեկտեմբերի 7-ին, կիրակի օրը, Մայր տաճարում, Հայոց Հայրապետի նախագահությամբ, հավարտ ս. պատարագի, կատարվում է հոգեհանգստյան պաշտոն՝ Գերագույն հոգևոր խորհրդի անդամ և հոգևոր ճեմարանի տեսչին տեսուչ, հանգուցյալ Մինաս Մինասյանի հիշատակին:

Վաստակաշատ դասախոսի, ազնիվ ու հայրենասեր հայ մարդու հիշատակը վառ ու անմոռաց կմնա Մայր Աթոռում բոլորի սրտերում:

Հանգիստ նրա ոսկորներին:

